



25. Septembari 2026

UKA2026/233

Peqqinnissaqarfiup sullissineri il.il. pillugit Inatsisartut peqqussutaata allanngortinnissaa pillugu Inatsisartut inatsisaat

(Akiliuteqartitsinerusalernissaq kiisalu taaguutini atorineqartunik naleqqussaalluni nutarterinissaq pillugit malittarisassanik aalajangersaanissamut tunngavissaq)
(Peqqissutsimut Inunnuluni Innarluutilinnut Naalakkersuisoq)

Siumut sinnerlugu inatsisissatut siunnersuut saqqummiunneqartoq pillugu qujavunga.

Siumumi inuiaqatigiinnik nukittuumik piujuartitsinissamillu siunertaqartunik ineriartortitsinissaq sulissutiguarparput, nammineq aqqissuussagut, nammineq ingerlatsinerput aammalu ataatsimoorussatut pisuussutitta akisussaassuseqartumik aqunissaat tunngavigalugit.

Peqqinnissaqarfik inuiaqatigiinni atugarissaarnermik tunngaviusut pingaarnersaasa ilagaat. Taamaattumik aamma akisussaaffigaarput qulakkiissallugu peqqinnissaqarfiup aningaasaqarnikkut sinaakkutaasa naapertuuttut nutaanullu naleqqussakkat pilersissallugit.

Inatsisissatut siunnersuut manna naapertorlugu Naalakkersuisut pisinnaatinneqassapput innuttaasut akeqanngitsumik katsorsartinnissamut pisinnaatitaanngitsut pillugit akiliisitsisarnermut maleruagassiorsinnaanermut. Siunnersuut Kalaallit Nunaanni innuttaasut pisinnaatitaaffiinik allannguuteqanngilaq, kisianni periarfissiivoq peqqinnissaqarfimmu aningaasartuutit tikeraanit aammalu innuttaasunit akeqanngitsumik katsorsartinnissamut pisinnaatitaanngitsunit pilersinneqartut annertunerusumik nammineq akilerneqarsinnaalernissaannut.

Siumumut matumani aamma nammineq oqartussaassutsip nukittorsarneqarnissaa pineqarpoq. Kalaallit Nunaat suliassaqarfinnik amerlanerusunik tigusaangat, taava aamma nammineq akisussaassuseqartumik aningaasalersuinissamut ingerlatsinissamullu sakkussaqaqtariaqarpugut. Qularnaassavarput aningaasat innuttaasunut atugassarititaasut sapinngisamik pitsaanerpaamik nunatsinni innuttaasunut iluaqutaasussanngorlugit atorineqarnissaat.

Siumut isumaqarpoq naapertuuttuusooq innuttaasut akeqanngitsumik peqqinnissaqarfimmik atuisinnaatitaanngitsut atuisarnerminnit aningaasartuutaasunut peqataassasut. Peqatigitilluguli pingaaruteqarpoq maleruagassat ersarissuunissaat naapertuilluartuunissaallu, taamaalilluni taksaritit suut atuunnersut aammalu tunngaviusut paasiuminartuunissaannik. Aamma maluginiarparput siunnersuut Kalaallit Nunaanni najugaqartunut peqqinnissaqarfimmik atuinissamut pisinnaatitaaffinik allannguuteqartitsinngimmat aammalu innuttaasut nunat avannarliit akornanni isumaqatigiissutit imaluunniit nunat tamalaat akornanni isumaqatigiissutit tunngavigalugit pisinnaatitaaffeqartut pisinnaatitaaffimminnik attassiinnassammata.

Siumumut pingaaruteqarpoq namminersorneq aningaasaqarnikkut akisussaassuseqarnerup peqatigisaanik ineriartortinneqassasoq. Nammineq ingerlatsinitsinnik nukittorsaataasinnaasunik



aammalu atugarissaarnermik aaqqissuussinitta aningaasalersorneqarnissaanut patajaannerusumik tunngaviliisinnaasunik periarfissaqartillugu, taava Kalaallit Nunaat imminut napatissinnaanerusumut alloriarnernik nutaanik pisarpoq.

Aamma maluginiarparput kommunit ernumassutaat tusaaniarneqarsimammata, taamaalilluni kommunit aningaasartuutiviusut sinnerlugit akiliisussaatinneqarsinnaajunnaarlutik. Tamanna oqartussaasut akornanni suleqatigiinnermut pitsaasumik tunngavissiivoq aammalu inatsisip atuuffissaanut erseqqissaataalluni.

Taamatut oqaaseqarluta Siumumiit siunnersuut ataatsimiititaliamut susassaqartumut ingerlateqqinneqarnissaa inassutigaarput aammalu suliap ingerlaqqinnissaa qilanaaraarput. Qujanaq.

Lars Poulsen, Siumut